



h

Broj razbojništava u Sarajevu u padu: Za pljačkašima koji su pucali na policiju još se traga

Objavljeno: 28.08.2017. u 22:16

Razbojnici su sve nemilosrdniji i drskiji, a već odavno ne biraju ni mjesto, a ni vrijeme napada. Pljačkaju sve, od kladionica, prodavnica i stanova, do slučajnih prolaznika na ulici.

Prema podacima MUP-a Kantona Sarajevo, u prvih šest mjeseci ove godine registrirano je ukupno 215 razbojništava. Iako se na prvi pogled ne čini tako, statistike ukazuju na to da se broj ovih krivičnih djela smanjuje u odnosu na godinu ranije.

- To je 75 ovih krivičnih djela manje u odnosu na isti period prošle godine. Od tog broja, ukupno je rasvijetljeno 110 razbojništava ili 51,1 posto – kazala nam je Suvada Kuldića, glasnogovornica MUP-a KS.

Razbojnici sve češće pljačkaju usred dana i na najfrekventnijim ulicama. U većini slučajeva razbojnici žrtvama prijete vatrenim oružjem, ali i hladnim kao što su noževi, šarafcigeri, staklo i slično.

- Njihov plijen su najčešće novac, mobiteli, vozila, nakit i ostali predmeti. U mjesecu junu evidentirana su 23 razbojništva, za koje je identifikovano 17 počinitelja, dok ih je sedam uhapšeno, a za 12 je službeni izvještaj dostavljen sarajevskom Kantonalnom tužilaštvu – kazala je Kuldića.

Prema statističkim podacima, sarajevska policija je u julu registrovala ukupno 27 razbojništava, od kojih je rasvijetljivo njih 15, a razbojnici su u "pothvatima", kao i inače, prijetili pištoljima, noževima, ali i fizički napadali žrtve. Statistike za ovaj mjesec ukazuju i to da su razbojnici čak dva puta vozačima oteli i automobil.

Pucali na policiju

Iako policija u većini slučajeva pronađe razbojnika, još se traga za onim koji je krajem jula rano ujutro, prijeteći radnici pištoljem, opljačkao trafik u "Tobacco Press" u naselju Nedžarići.

Prema informacijama iz policije, identitet ovog razbojnika još nije poznat. Radnica trafike, koja se nalazi u ulici Ante Babića, nedugo nakon pljačke novinarima Faktora ispričala je kako je razbojnik bio obučen u policijsku uniformu, te ju je vezao za stolicu i sve vrijeme joj prijetio pištoljem.

Prestravljena radnica kazala je tada kako je "policajac" iz trafike pokupio novac i cigarete, a potom pobjegao. Radnica je, kako smo saznali, policiji također kazala kako je pljačkaš izgledao

kao njihov kolega, te će, između ostalog, tek nakon što se utvrdi identitet razbojnika, biti poznato da li je zaista riječ o policajcu ili je u pitanju bila domišljata maska.

Jedno od dramatičnijih razbojništava dogodilo se krajem marta, kada su trojica nepoznatih razbojnika opljačkala mjenjačnicu koja se nalazi u sklopu hotela "Hollywood" na Ilidži, a tom prilikom je jedan od pljačkaša uperio pištolj i u policajca, nakon čega je došlo do pucnjave.

Oružana pljačka dogodila se "usred bijela dana", nešto prije 14 sati, a razbojnici su od radnika oteli određenu sumu novca.

Dok su izlazili iz hotela, stigla je patrola i policajci su im naredili da stanu i odlože oružje. Međutim, jedan od razbojnika je uperio pištolj prema policajcu, nakon čega je policajac zapucao u pravcu pljačkaša.

Razbojnici su potom pobjegli u audiju, a prilikom pljačke i pucnjave niko nije bio povrijeđen. Koliko je poznato, ovo razbojništvo do danas nije rasvijetljeno.

"Upadaju" i u kuće

Razbojnici ne prezaju ni od toga da ulaze u domove dok su ukućani unutra, pa su tako krajem aprila upali u kuću dvoje staraca u ulici Brusulje u Starom Gradu, koje su vezali, teško pretukli i opljačkali, tražeći od njih da im daju novac.

Sve se odigralo oko 22 sata, nakon što su stariji supružnici legli da spavaju. Dvojica nepoznatih muškaraca u njihov dom upala su kroz prozor. Starce su odmah počeli tući, prijeteci im nožem i pištoljem, tražeći da im otkriju gdje drže novac.

Nakon što su im oni rekli da u kući nemaju novca, te da sve što imaju drže u banci, svezali su im ruke i noge ljepljivom trakom, a potom ispreturali sve stvari po kući u potrazi za novcem. Sve vrijeme, nesretnom paru su prijetili da će ih ubiti i brutalno ih udarali po glavi i tijelu.

Nakon što su u kući našli manju svotu novca, pobjegli su, ostavivši supružnike svezane. Nesretni starci uspjeli su se odvezati tek oko 6 sati ujutro, nakon čega su otišli do komšije i pozvali policiju. Oboje su nakon toga prevezeni u sarajevski Klinički centar na ukazivanje pomoći, a ljekari su, srećom, kod oboje konstatirali lakše tjelesne povrede u vidu brojnih kontuzija po glavi i tijelu.

Međutim, ni Sarajlije ne ostaju ravnodušne na takve stvari i ne prepuštaju ih uvijek slučaju, već uzimaju "u svoje ruke". Tako je krajem aprila u općini Novi Grad u Sarajevu, tačnije u ulici Milana Preloga, uhapšena jedna osoba, koja je pokušala počiniti razbojništvo u sportskoj kladionici "Bet Live".

Hitrom reakcijom prisutnih građana pljačkaš je zadržan do dolaska policajaca Treće sarajevske PU, a prema podacima objavljenim na stranici MUP-a KS, razbojnik je identificiran kao 22-godišnji F. F. iz Sarajeva.

*Faktor pratite putem aplikacija za **Android**. Pratite nas i na društvenim mrežama **Facebook** i **Twitter**. Zabranjeno je prenošenje sadržaja bez odobrenja redakcije. Kontaktirajte nas na **redakcija@faktor.ba**.*